



DIA MUNDIAL DI METEOROLOGIA 2005 WER, KLIMA, AWA I DESAROYO DURADERO

**Resúmen di mensahe di sr. M. Jarraud
Sekretario-General di OMM**

Riba Dia Mundial di Meteorologia ta rekordá establesementu di Organisashon Mundial di Meteorologia (OMM) riba 23 di mart 1950. E aña aki skohe e tema di “Wer, klima, awa i desaroyo duradero” pa rekonosé e papel vital i kontribushon tremendo di meteorologia, hidrologia i otro siensianan geofísiko relashoná ku progreso humano, desaroyo sosio-ekonómiko duradero, protekshon di ambiente i alivio di pobresa.

Lantamentu di OMM a anunsiá un era nobo, kousando un progreso rápido den e siensianan aki, teknologianan i koperashon internashonal. E desaroyonan aki a ser transformá rápidamente den establesementu di sistemanan riba nivel mundial pa protekshon di bida i propiedat, redukshon di desasternan natural i aplikashon di vários aktividat sosio-ekonómiko den sosten di desaroyo duradero definí komo “*topa nesesityadnan di e generashon aktual sin stroba abilidad di próksimo generashonnan pa yuda nan kurpa.*”

Na aña 2000, Nashonnan Uní a re-enfoká su esfuersonan pa promové desaroyo sosial i ekonómiko sin hasi daño na medio ambiente dor di hasi un petishon na tur Miembro di Nashonnan Uní pa logra e asina yamá Millenium Development Goals (Metanan di Desaroyo den Milenio òf MDGs). Algu di esakinan, ku mester ser realisá pa mas tardá na 2015, ta di hopi interes pa OMM:

- Redusí na mitar e kantidat di hende ku ta biba di ménos ku un dòler (merikano) pa dia òf ta sufri di hamber;
- Redusí na mitar e kantidat di hende ku no ta kapas pa haña òf kumpra awa seif pa bebe;
- Enfrentá vulnerabilidad, evaluashon di riesgo i kombatementu di desaster, inkluyendo prevenshon, redukshon, preparashon, reakshon i rekobramentu komo un elemento esensial pa un mundu mas sigur;
- Enfrentá temanan relashoná ku kambio den klima, inkluyendo vigilashon i implementashon di strategianan relevante na nivelnan nashonal, regional i internashonal;
- Sigurá durabilidad di medio ambiente;
- Desaroyá un relashon di koperashon na nivel mundial pa desaroyo.

OMM su kontribushonnan na e inisiativanan aki ta tuma vários forma. Un promé enfoke ta pa mehorá opservashonnan i pronóstikonan di estado di atmósfera i awa terestre, nan interakshon ku otro i ku otro sistemanan terestre i tambe riba pre-atvertenshanan.

Progreso den tantu opservashonnan djaleu, manera radar i satélite i otro fasilidat di monitor komo tambe den prosesamentu di dato i komunikashon, a kondusí na un komprendementu científiko hopi mas mihó di prosesonan dinámiko i físiko di atmósfera i oseannan i nan interakshon ku otro komponentenan di e sistema di Tera. Komo resultado di esei, a logra mehorashon sin presente den kalidat i presishon di pronóstiko i atvertensha di tempu. Ta posibel awendia pa traha pronóstiko di tempu shete pa dies dia delantá den regionnan di klima templá i tambe di tres pa kuater dia delantá den regionnan tropikal. Un otro desaroyo tremendo ta e pronóstiko basta tempu delantá di fenomenonan manera *El Niño* i *La Niña*. Danki na mihó konosementu i e ret di fasilidatnan ku tini awendia, ta posibel pa generá pronóstiko útil pa tipo di fenómeno asin’ei algun luna te un aña delantá.

OMM tabata un forsa mayó tras di e logronan den konosementu i konsiensia di ambiente físiko. OMM ta saka su forsa for di e echo ku wer i klima no ta rekonosé bareranan polítiko òf ekonómiko i tambe for di e dedikashon konstante di su Miembronan. OMM su Programanan ta ser formulá dor di su Miembronan i ta ser

operá dor di nan pa logra nan metanan di un desaroyo duradero. E logro úniko aki a duna OMM e reputashon di ta un ehèmpel kon pa koperá riba tereno internashonal i tambe di ta un lider den kon limitá i evitá desaster i ademas tambe nan ta un kontribuidó mayó na desaroyo sosio-ekonómiko duradero.

Desaroyo asin'ei a mehorá bienestar di humanidat formalmente. Retonan nobo, sin embargo, a bini aserka manera un oumento den konsentrashon di "gasnan di broeikas" den atmósfera, kambio den klima, baimentu atras di e kapa di ozon den stratosfer, un bahada di fuentenan di awa dushi i finalmente un oumento den polushon di atmósfera i awa.

Miéntas ku ningun hende no por kontrolá wer, opservashonnan eksakto, pronóstikonan ku mas eksaktitud i di mas tempu adelantá por mehorá radikalmente e posibilidat di humanidat pa biba den seguridat relativo, kreando asin'ei un bida mas kómodo i tambe protehando rekursionan natural presioso ku mas efektividat. Pa paisnan vulnerabel, kreamentu di kapasidat den e paisnan aki mes i koperashon na nivel mundial ta esensial pa logra e metanan aki. OMM i tur e Servisionan Meteorológiko i Hidrológiko Nashonal tin un oportunidat úniko pa kontribuí na e esfuersonan nashonal i na nivel mundial. Den e konteksto di su mandato, OMM lo sigui fortifiká su programanan sientífiko i tékniko, mehorá su aliansanan stratégiko i sigui hasi esfuerso pa krea kapasitashon i mobilisashon di su fuentenan.

E mehoramentu di e kapasidat pa pronostiká ku énfasis riba mal tempu ta un prioridat. Esaki lo mester hasi posibel pa saka atvertenshanan di eventonan severo mas presis, na tempu i konfiabel pa sigurá ku tur hende ta mihó prepará i konsiente i tambe pa redusí vulnerabilidad. Mester pone mas énfasis riba e pasamentu di resultado di estudionan na aplikashonnan operashonal ku lo kontribuí na protekshon di bida i propiedat, limitashon di desasternan natural, promoshon di desaroyo sosial i ekonómiko duradero i protekshon di ambiente.

Riba término mas largu, desaroyo duradero ta eksigí tambe ku ta komprondé e sistema di klima mihó ku posibilidat pa antisipá kambionan di klima den futuro i nan impakto potensial riba variabilidad di klima, aktividatnan sosio-ekonómiko i medio ambiente. Planifikashon pa enfrentá e menasa di kambio den klima ta rekerí senarionan mas detayá na nivel regional, inkluso variabilidad den patronchi di tormentanan i áwaseru, impakto di subimentu di nivel di laman i su menasa pa áreanan poblá. OMM lo sigui hasi esfuerso pa mehorá vigilashon i tambe desaroyá mihó modèl nan di pronostiká klima pa redusí e insertidumbre den pronostiká klima pa asin'ei asistí den un adaptashon eksitoso i pa hasi posibel ku ta implementá un bon maneho polítiko i ekonómiko na nivel nashonal i internashonal.

Na momentu ku nos ta selebrá e Dia aki, ta mi deseo ku aña 2005 lo trese mas rekonosementu i uso di produktonan di Servisionan Nashonal di Meteorologia i Hidrologia na benefisio mas amplio di aktividatnan di desaroyo duradero. Nos ta anhelá pa sigui fortifiká OMM su koperashon ku tumadónan di desishon i otro outoridatnan nashonal, komunidad sientífiko, otro organisashonnan di Nashonnan Uní, organisashonnan no-gubernamental, sektor privá, medionan di komunikashon i públiko en general pa di e manera ei sigurá mihó komunikashon i tambe pa enfrentá na un manera efektivu i retonan ambiental i di desaroyo riba tereno di wer, klima i awa ku humanidat ta enfrentá den siglo 21.
